

左恪靖侯奏稿初編

恪靖奏稿初編卷三目錄

衢州東南北三路一律肅清摺

探報湖州府城失守片

道員蕭差回籍延不歸營請旨革職片

查明浙江失事文武各員片

甯台郡縣克復溫郡漸就肅清摺

請援照湖北米捐減成章程收捐以濟軍食摺

蠲免浙省錢糧敬陳辦理情形摺

請飭催道府各員迅速赴浙摺

馳援遂安擊敗大股逆賊摺

總兵請假回籍遴員接署摺

資遣衛防兵勇片

查辦失守文武先將情罪較重之員定擬摺

衢州東南北三路一律肅清摺

奏爲官軍攻剿衢州東南北三路賊壘地方一律肅清
現籌進取情形恭摺奏祈

聖鑒事竊臣前因衢州南北兩路喫緊由開化回軍五
月初四日馳抵衢州西北路沐塵地方詢知侍逆李世
賢糾集賊目馮谷勝陳壽僞主將賴逆僞佐將林逆駱
逆等由龍游蘭溪壽昌上犯於北路峽口蓮花童村裏
外黃五坦洋塘盈川一帶聯營三十餘座並盤踞杜澤
雲溪琿塘等處村莊又令僞嘏天義李逆鮒天義侯逆

於南路石室街築四壘聯爲一大壘東路大洲全旺安
仁埠等處各築數壘相爲犄角臣蔡北路地勢緊連遂
安開化常山賊勢亦較重於東南兩路前處州鎮總兵
劉培元一軍入浙後臣卽飭其進紮常山適江西撫臣
念臣軍兵力單薄調信防屈蟠王德榜兩軍赴浙會剿
臣并飭其會合劉培元一軍進駐江西縣屬後溪街以
防石室街之賊而自率各軍由北路進剿其東南安仁
街一帶之賊檄李定太飭總兵郭啟舉等憑河堵截以
防橫竄十二日派各營分九路並進甫抵雲溪賊見我

軍旂幟不及列隊紛紛奔潰我軍猛躡之僅擒斬百餘人而還十三日臣率各軍進紮雲溪十五日分三路進攻裏外黃蓮花等處賊巢楊昌濬張聲恒楊和貴督各營出右路進劉典楊鼎勳朱明亮余萃隆黃有功馬德順督各營由中路進李耀南陶鴻勳鍾南英李良平劉光明張人和邢得督各營由左路進崔大光李世顏楊芳桂督各營從後接應我軍左路南至艮山涼亭而進花洋塘盈川等處之賊先已列隊田壠並挑悍賊數千過河而陣張聲恒率勇先進甫列陣悍賊數十躍馬而

來步賊繼之張聲恒令鎗礮排擊賊敗追至出壠賊復張兩翼來抄對岸之賊亦紛紛踣淩過河張聲恒悉力抵禦正鏖戰間楊和貴馬德順及兵兩哨先後馳至縱騎馬賊目數人賊勢稍却乘勝追至河邊侍逆李世賢張紅蓋坐山巔麾騎賊向前衝突楊昌濬率親兵往來堵禦刀矛緊接斃悍賊數十人我軍陣亡及受傷者亦以數十計相持兩時之久適我軍由左路進攻峽口者斃賊二百餘人破賊壘三座楊鼎勳復出蓮花過河燒賊大壘一座殺悍賊數十名侍逆偵知中左兩路俱敗

不敢戀戰紛紛遁走我軍復追數里始整隊而還此十
二十五兩日攻勦獲勝之情形也嗣大雨連旬溪流暴
漲我軍距賊巢前阻二溪不能覓水出隊至六月初五
日天霽水退初七日卽飭劉典督同各營旗由左路進
攻裏外黃之賊楊昌濬督同各營旗分列艮山涼亭一
帶會攻蓮花洋塘盈川之賊我軍左路行抵童村山上
瞻見外黃村莊甚大後崙山一帶賊壘亦極堅固劉典
遂麾中營各哨嚴陣村前河干同李良平楊和貴伏童
村下山內黃有功邢得伏童村上山內遣親兵數十人

至村前挑戰外黃之賊見我兵下多蜂擁而來劉典飭
各哨聽站勿動令黃有功邢得自土邊見水過河繞出
賊後裏黃壘中之賊大隊來援劉典即麾軍過河接戰
楊芳桂馬隊繼之外黃壘中之賊見我軍過河亦見水
來鈔後路李良平楊和貴於林內突起擊之各路齊進
呼聲動天無不以一當百賊敗退入營燃放鎗礮我軍
奮勇直前拔開花離地刺踰壕而入賊勢不支適楊鼎
勳劉光明張志超所部由峽口繞至外黃後巔搖旗擂
鼓而下羣賊驚駭不知所措棄械狂奔中右兩路見左

路烟燄蔽空知我軍得手卽分路乘勢進攻蓮花壘中
之賊亦悉數遁走追奔二十餘里將沿途賊壘一律踏
平是役斃悍賊數百名生擒六十名拔出難民男婦以
數千計下自盈川上至裏外黃一帶數十里間賊壘三
十餘座一律踏燬淨盡奪獲偽印十餘顆軍械鎗礮旗
幟無算其南路石室街東路大洲之賊聞北路賊巢旣
破驚怖殊甚初九日卯刻劉培元李定太會同江西派
委援剿之屈蟠王德榜等各率所部由南路進剿賊聞
官軍大至棄壘狂奔各營急起追之比至大洲大洲賊

亦棄壘遁沿途斃賊百數十名所有衢州東南兩路賊
匪亦一律踏毀淨盡此六月初七初九兩日剿平衢郡
東南北三路賊巢實在情形也現在各敗賊紛竄龍游
亦有竄至蘭溪者臣俟軍米運齊卽督各營相機攻剿
竊維浙江賊數雖數十萬之多而皆聽首逆李世賢一
人之指喉該逆自江山擊敗後卽由遂昌邊境繞道回
踞龍游而倚金華爲老巢嚴處爲犄角蘭溪壽昌湯溪
宣平松陽等縣皆分布賊黨拼死抗拒五月十五日該
逆經官軍擊賊後是夜由龍游退回金華嗣竄永康近

又有竄湯溪縣境之賊賊蹤倏忽靡常其注意仍在抄襲臣軍後路臣先擬衢州江山兵力足資堵截卽當由壽昌清安直搗嚴州以規省會近據杭州守賊無多賊之大勢趨重金華自應併力先將龍游壽昌蘭溪湯溪等處次第攻剿撤其藩籬犁其巢穴然後分兵嚴處嚴之以取破竹之勢蔣益澧五月初七日自廣東省城發稟尚無啓行確期所部十七營已早飛札催之大約到浙當在七月臣相度形勢似宜先金華而後嚴處拜摺後卽當進圖龍游壽昌節節搜剿冀於全局有尺寸之

補軍新募之勇已陸續前來劉培元所部三千二百
名已於五月初一日到新軍正造船調礮添設水師一
俟就緒相機布置亦可稍資陸路兵力而護運軍食軍
火乃能免遲滯而速戎機所有攻剿獲勝衢州東南北
三路一律肅清緣由謹會同協辦大學士兩江督臣曾
國藩恭摺由驛馳

奏伏乞

皇上聖鑒訓示施行謹

奏
同治元年六月十六日

議政王軍機大臣奉

旨另有旨欽此

探報湖州府城失守片

再臣頃據江蘇候補知府趙炳麟自安慶發稟稱接上海來械探聞湖州府城已於五月初三日失守其詳細情形尙候續探稟報臣查湖州府城孤懸賊中紳民苦守數月之久卒以糧盡無援致有此變臣忝膺疆寄不能迅速援剿咎無可辭應請

旨將臣交部嚴加議處其一切詳細情形容俟查明具

奏理合先行附片請

旨 同治元年六月十六日

議政王軍機大臣奉

旨另有旨欽此

道員籍隸回籍延不歸營請

旨革職片

再甯紹台道梁恭辰上年八月在杭經前撫

臣

王有齡

飭令赴閩催餉迄今尙未來浙亦未稟報催提何款及

有無著落

臣

查該員赴閩正浙事孔亟之會閩省有餉

可催則應解餉赴浙閩省無餉可催亦應赴

臣

營另候

差委乃該員籍差回福建原籍在彼逗遛七八月之久坐視浙事之成敗以便進止之私圖其居心實不可問若再任其濫廁監司殊不足以端表率應請

旨將該員革職永不敘用以爲屬吏規避取巧者戒至前署甯紹台道張景渠已奉

旨革職等因現在台州甯波相繼克復員缺未便久懸查有委用道史致諤前在江西南昌知府任內辦事實心頗洽輿論現飭赴上海勸辦捐輸於甯紹情形亦尙熟悉所有甯紹台道一缺應檄飭該員署理並請另行

簡放以重職守是否有當伏乞

聖鑒施行謹

奏

同治元年六月十六日

議政王軍機大臣奉

旨另有旨欽此

查明浙江失事文武各員片

再浙省失守文武各員謹奉

諭旨交臣查辦現已革總兵米興朝羅大春布政使林
福祥織造恒起俱先後赴營投到此此外尙有升用總兵

副將余永椿署杭嘉湖道劉齊昂金華府知府王桐署
金華府知府徐慮善皆係失事之員亦陸續自行來營
呈遞親供均已飭交代辦藩司硃式敬署衢州府知府
吳艾生派員看守訊取供詞統候分別情罪輕重定擬
另行具奏請

旨其逃赴上海之已革總兵況文榜吳再升副將陳步
高貴廷芳等迄今尙未解到應請

飭下江蘇撫臣仍遵前

旨派員將該革員等迅速解赴臣營歸案審辦所有遵

查失事各員理合先行附片陳明伏乞

皇上聖鑒謹

奏

同治元年六月十六日

議政王軍機大臣奉

旨另有旨欽此

甯台郡縣克復溫郡漸就肅清摺

奏爲台州甯波郡縣克復溫郡漸就肅清現籌辦理情形奏祈

聖鑒事竊定海解圍後克復鎮海甯波及慈谿奉化等

縣均經前江蘇撫臣薛煥及署撫臣李鴻章先後奏報
台州郡縣全境以民國之力克復溫郡亦漸次肅清均
經督臣慶端奏報數郡皆遠在海隅臣由開遂江甯以
進衢州相距千餘里中隔賊氛得報稍遲據各處文報
證以所聞畧悉梗概台郡地瘠民強上年逆首李世賢
竄陷後分遣逆黨散踞各縣爲縱橫海上之計李世賢
旋以官軍入浙急思抗拒乃由台州還竄金華賊目李
鴻釗李元祿李尙揚等在台大肆淫掠士民不堪其毒
因倡義討賊各相糾率出賊不意擊之旬日之間連復

郡邑號賊五六萬賊目皆就擒斬臣獲棧天義羅賊致
李世賢僞書言台事甚詳其畏仙居士民尤甚論台黃
出力士紳以在籍江蘇補用道蔭鏡蓉爲最仙居出力
士紳以副貢生吳琮爲最而吳琮以其父被害殺賊報
仇英烈之風尤定矜式鄉里爲可嘉也定海擊賊解圍
後復克鎮海厥後隨同外國兵船直撲甯波多得布良
有布良帶等之力布良有在洋橫行有年熟習海上情
形前任浙江臬司段光清撫而用之以護商旅司巡緝
加意羈縻始就安帖此次陳世章張景渠用之亦得其

力甯波既克敗賊遁入紹興台郡既克敗賊萃於處郡
溫郡之賊畏台郡士民之鈔其後則由處郡以回竄金
華就現在局勢言之裏賊中央絕其紛竄似亦浙事一
大轉機而官軍不能無慮也台郡之克全藉民國甯
波之克半資外國而官軍曾無一旅與之周旋無論外
國助剿非由義憤所激雖可偶用其長未可常恃其助
也卽台郡士民一時偕作同仇無良將吏爲之主持終
慮情渙氣衰難以持久臣現飭代理台州府嚴州府同
知臬齡於赴任之後詳察各處情形及實在出力士民

分別安撫獎勵諭蘇鏡蓉吳琮等五州聯給以收眾志
成城之效檄飭委署甯紹古道史致謬先由安慶雇坐
輪船駛赴上海由定海鎮海以抵甯波察看情形並經
理稅釐事務是百堪以養兵若干隨時馳稟以便核酌
一面札調前浙江臬司段光清甯波紳士陳政衢令其
隨同經理以資得力一俟臣處所調兵勇到齊餉項有
出再斟酌辦理如屆時處州已復則分撥之軍當由處
州台州陸路以達甯波否則須俟助攻處郡得手然後
可無中梗之患頃奉

寄諭選調得力員弁帶領兵勇航海赴甯協同華爾常
勝軍七百名聯絡守禦

聖意淵深莫名欽佩臣維兵勇航海不由安慶僱輪舟
赴滬則必由閩海僱船赴鎮海如僱輪船則費用不貲
此時實無從籌措如僱閩船則船隻頗少不能一次取
齊且由此陸行至安慶至福建省城較由處州台州直
達甯波道里相等正不必迂道航海徒滋勞費惟臣軍
欠餉已七箇月轉脩新軍到浙需餉更多無以爲計又
師行台處之間所過皆殘破之餘無米可買最爲難處

容侯察酌情形再爲籌辦至英國所稱調印度之兵秋
間才大舉助剿一說或係該公使等懸擬之詞不必實
有其事聞英國兵餉最重亦頗以調發之煩爲苦調兵
必俟其國主之命非該公使等所能專印度兵船距中
國五六萬里亦非一時所能驟集也至諸暨縣民包立
生聚衆殺賊頗著戰功然傳聞異詞未敢遽信其真可
倚在容侯察明隨時復

奏所有籌辦原由謹據實馳陳伏乞

皇上聖鑒訓示謹

奏

同治元年七月二十六日丙閣奉

上諭左宗棠奏官軍攻剿衢州東南北三路賊壘地方
一律肅清並紳民兵勇克復台州甯波郡縣情形各一
摺逆首李世賢糾黨由龍游等處上竄經左宗棠督軍
分路進剿先將蓮花洋塘等處賊壘攻破逆匪敗遁六
月初七日臬司劉典等分道並進復將裏外黃等處賊
匪擊敗追殺二十餘里殲斃悍賊數百名生擒六十名
救出難民數千名踏燬賊壘三十餘座其南路石室街

東路大洲賊匪復經劉培元等會同江西會剿之師節節進剿該逆棄壘狂奔沿途斃賊百數十名衢州東南兩路賊壘亦一律踏燬地方肅清剿辦尙屬得手著左宗棠親督各軍由龍游等處進剿次第克復各城其台州紳民倡義討賊旬日間連復郡縣斃賊五六萬名賊目李鴻釗等悉就擒斬該紳民等敵愾同仇深知大義殊堪嘉尚著左宗棠傳旨嘉獎甯波郡縣各城克復情形前據李鴻章處端先後馳奏茲據左宗棠派員前往卽著飭令在事員弁迅速進攻所有台州等處出力紳

民兵勇並著查明酌保候旨施恩用昭激勵欽此

議政王軍機大臣 字寄同治元年七月二十六日奉
上諭據左宗棠奏攻剿衢州三路賊壘地方肅清並台
州甯波郡縣克復溫郡漸次安堵各一摺覽奏甚爲欣
慰已明降諭旨宣示矣逆首李世賢自江山擊敗後倚
金華爲老巢嚴處爲犄角該撫本擬由嚴州進規省垣
現因龍游等處賊黨分布擬先撤其藩籬犁其巢穴然
後分兵於嚴處以收破竹之效隨機決策甚合機宜卽
著由龍游等處進剿若金華克復則規取省城自屬更

易得手惟蔣益澧所部尙在湖南本日已諭毛鴻賓速
備餉需催令赴浙並著左宗棠催提其劉培元一軍抵
浙後正在造船調礮添設水師亦屬軍行必不可少卽
檄令妥爲辦理該撫本擬令劉培元署理衢州鎮現在
是否派令署理總統衛防卽著酌量辦理台州各屬士
民深明大義奮勇殺賊前已降旨褒獎該撫旣知蘇鏡
蓉吳琮最爲出力布興有等頗能勦賊不妨奏請獎敘
藉以收拾人心不致氣竭情渙甯波雖地處海濱而於
籌餉尙足取資本日已將史致諤簡放甯紹台道卽著

飭令悉心將稅釐事務妥爲經理前據慶端奏稱甯波克復保道員張景渠知府林鈞會同辦理張景渠既經革職拏問林鈞尤不協民情著一併革職查辦另委賢員接署得與紳民聯絡於籌餉防守更爲可恃儻餉項可籌卽將楚軍酌派前往以資進剿另片奏米興朝等到營分別審辦並湖郡失守自請嚴議等語米興朝等逃潰滋擾各情已屬罪無可追而林福祥以方面大員覲然投賊尤爲罪不容誅著左宗棠於審明後應正法者一面傳旨先行正法一面奏聞庶喪心昧良之員不

致久稽顯戮以肅軍律而慰人心陳步高貴廷芳經李
鴻章解交曾國藩軍營審辦如應有質訊之處卽行咨
詢毋庸解赴浙江況文榜吳再升二員已諭李鴻章訊
解浙營湖州雖係該撫統轄之地而隔於形勢無從救
援情屬可原所請交部嚴議之處著加恩寬免其失守
情形並趙景賢等下落卽著查明具奏再該撫此摺於
六月十六日拜發遲至四旬始行遞到已面諭兵部堂
官嚴查著該撫一併詳查參奏以免稽遲將此由六百
里諭令知之欽此

同治元年七月二十六日內閣奉

上諭左宗棠奏道員藉差回籍延不歸營請旨革職等語浙江甯紹台道梁恭辰於上年八月間經前任巡撫王有齡飭赴福建催餉輒敢任意逗遛至七八月之久延不回浙亦未將催提何款有無著落詳細稟報實屬規避取巧梁恭辰著卽行革職永不叙用以示懲儆欽此

同治元年七月二十六日內閣奉

上諭浙江甯紹台道員缺著史致諤補授

請援照湖北米捐減成章程收捐以濟軍食摺

奏爲軍食匱乏請援照湖北米捐減成章程以濟饑軍以支危局仰祈

聖鑒事竊浙江此次之變膏腴之鄉盡爲賊踞而上年逆首李世賢等成先後竄浙正值農民分秧割稻之時舊穀被掠新穀無收不但軍食無從採辦卽遺黎僅存者率皆饑疲不堪而無人色甚則槁死破屋之中胔骼縱橫無人收殮疫氣流行田土荒廢皆由於此臣軍行所至目睹此狀無淚可揮經過開化馬金達安西安

等處皆曾勻撥錢米交地方官紳酌量依分聊紓災民
旦夕之死過後則又不知作何光景矣臣軍食米在遂
安馬金開化一帶則從江西之景德鎮樂平縣各處採
負舟運婺源江灣德興航頭等處陸運遂安及開化之
華埠而後達於行營在衢州西安江山一帶則從江西
之廣信玉山各處採買舟運七十里陸運常山而後達
於行營所經河道則灘高水淺逆流挽運一船數石十
數石不等陸路除玉山至常山路爲平坦可通小舟外
餘皆攀崖踰嶺頂踵相接每人每日光負不過三四斗

行走不過數十里而已力盡筋疲勞費不可勝計以故
運購總不能多兵勇常憂缺食每追剿迎擊事機喫緊
之際輒以食米無措不能迅赴戎機軍事難以稱意亦
由於此近時各省協浙之餉解到寥寥採辦苦無糴本
朝不謀夕尤覺不支江西撫臣沈葆楨及布政使李桓
深知臣軍饑困情形慨然思所以拯之於江西省倉撥
米穀二萬石陸續委解廣信交臣後路糧臺動碾接濟
復飭江西現任各官捐輸浙餉並各捐廉以爲之倡其
爲浙省軍民計者實已無微不至然爲數無多不過暫

時敷行轉餉

奏調各軍齊至何以備之臣忝任危疆自恨一籌莫展
憂灼何言因思前湖北撫臣胡林翼當鄂餉支絀之時
有減成收捐之請先經部臣奏駁上年九月十八日始
奉

旨允行鄂省大局藉以支持亟應仿照辦理查湖北奏
准原案凡捐實職虛銜照籌餉例統減四成升銜加級
各項向減四成者准再遞減三成於水陸通區設局收
米捐米一石加耗米一斗五升運腳費三錢五分准作

捐例銀五兩其有陸路遙遠運米維艱者准交折色每
米一石連折耗運費兌交庫平足紋二兩五錢其飯銀
照費仍照例交納均以庫平足紋上秤概不准搭交錢
鈔餉銀等項其應歸京銅局收捐各條並補交四成實
銀者仍不准收以裕京餉業經行之有效臣維湖北減
成收捐之請在全省漸次肅清之日丁漕鹽釐等項尙
不致涓滴全無祇以餉事維艱尙蒙
俞允浙省軍民現在饑困情形奚啻十倍於鄂而米價
之昂水陸運腳之多又較鄂爲甚籲懇

皇上天恩特恩准旨照准湖北減成捐案凡浙江紳商之流寓他省者一體遵照捐輸其江西湖南兩省業經奏請

頒給部監執照者應自奉

旨允行之日爲始由該兩省藩司查照減成新例填給執照其皖南各屬向因連年防堵耗浙餉近千萬之多此時浙省軍食無資應令一體捐輸以明施報之誼其廣東一省經前撫卞王有齡委員帶照前往勸諭浙人捐輸卽近今採購洋礮火藥爲配駕兵船之用亦應查

照米捐派成章程收捐以期速效此外如有非浙籍而情願捐輸者亦聽其便所有前撫臣王有齡奏請部監執照三千四百張已於五月廿一廿三等日由驛遞到謹擬將此項執照均勻酌搭先發各省以憑趕緊收捐接濟恐尙不敷應請

飭下戶部再行加發各項職銜及貢監生等照五千張迅速由驛飛遞前來俾裕軍食而利戎機伏乞

皇上聖鑒施行謹

奏

同治元年六月十六日

議政王軍機大臣奉

旨以有旨欽此

同治元年七月二十六日內閣奉

上諭左宗棠奏請援照湖北米捐減成章程收捐一摺
浙江軍務方殷左宗棠添調各軍陸續可到需餉實屬
浩繁著准其按照湖北米捐減成章程收捐浙江紳商
之流寓各省者准其一體捐輸其江西湖南兩省業經
由部頒給執照者著自奉旨之日爲始由各該省藩司
查照減成新例填給執照其有匪非藉隸浙江情願捐

輟者亦准一例照辦惟若戶部再行發給各項職銜及
貢監等執照五千張迅速由驛遞至浙江交左宗棠接
收餘著照所議辦理該部知道欽此

緝獲浙省錢糧敬陳辦理情形摺

奏爲浙省同治元年錢糧欽遵

恩旨豁免敬陳辦理情形以廣

皇仁事竊維浙江一省自被逆賊竄擾以來郡縣城池
之僅存者惟衢州溫州及附郭之西安永嘉廳縣城池
之僅存者惟定海石浦龍泉慶元泰順而衢州一城以
外均徧遭蹂躪溫州則先被會匪闖入繼遭髮逆肆擾
鄉村幾無完土統計被禍之烈實爲各省所無五月初
十日臣於行營准戶部咨開江南司案呈咸豐十一年

十二月二十日奉

上諭近年江蘇安徽浙江地方被賊蹂躪小民流離失業慘不忍言迭經降旨蠲免冀蘇民困現在該三省失陷城邑多未攻克卽令漸次規復而田廬半遭兵燹耕作未免失時朕眷懷南服深用惻然所有江蘇安徽浙江失陷郡縣明年錢糧漕米著一概蠲免以紓民力該督撫卽刊刻謄黃徧行曉諭務使實惠均霑毋使吏胥舞弊用副朕加惠窮黎至意欽此臣等比飭司刊刻謄黃徧行曉諭在案惟查各處情形除定海廳石浦廳及龍

泉泰順慶元三縣未被賊擾外其現已肅清地方有城池重圍未久旋即收復鄉村間有未被擾者有城垣幸存而鄉村受害轉甚者本年錢糧均應在

恩旨蠲免之列而各該縣上年應完錢糧有地方正辦防勦甫經開徵者有從前官軍經過就近徵糧准抵正賦者辦理情形殊非一律伏釋

恩旨錢糧漕米一概蠲免係指同治元年攻克邵縣而言其受害較輕地方咸豐十一年應徵錢糧自不能援照蠲免惟民力有充絀之殊受害亦有輕重之別合無

仰懇

皇上天恩俯准將咸豐十一年分被擾各縣應完錢糧
實欠在民者分別徵蠲務期允協其同治元年錢糧未
奉到

恩旨蠲免之前青已經完納者准留抵同治二年新賦
其爲數較多者如願改作捐輸門按照數目給予契收
以昭公允庶徵蠲並行辦理可與畫一而公私咸濟貧
富共戴

天恩是否當伏候

皇上訓示施行謹

奏

同治元年七月初九日

議政王軍機大臣奉

旨另有旨欽此

同治元年閏八月初二日內閣奉

上諭前因浙江被匪竄擾民困未蘇將該省同治元年錢糧漕米一概蠲免茲據左宗棠奏稱查明該省情形請將被擾各縣應完錢糧分別徵蠲等語著照所請所有咸豐十一年分被擾各州縣應完錢糧實欠在民者

著該撫查明分別徵蠲勿稍牽混其同治元年錢糧未奉到恩旨蠲免之前有已經完納者准留抵同治二年新賦其爲數較多者如有願改作捐輸卽按數照章給予獎敘以昭公允餘著照所擬辦理欽此

請飭催道府各員迅速赴浙招

奏爲請

旨飭催道府各員迅速赴浙以資差委恭摺馳

奏仰祈

聖鑒事竊維浙省自上年被賊竄擾列郡淪胥所有地方各員非避匿無蹤卽例應查辦遇有克復郡邑及地方應辦事件差委無人茲據代辦布使使蘇式敬詳稱查有金衢嚴道恒山於咸豐十年九月分補授處州府知府劉鼎盛於咸豐十一年十一月分選補迄今尙無

到浙之羽應請

旨飭下各省督撫查明該員等在何處逗遛飭令迅速
赴浙又金華府知府徐寶治於咸豐十一年六月奉
旨簡授現據該員稟稱尙在上海措資應請

飭下江蘇撫臣催令迅速起程不得藉端逗遛再滋曠
悞此外州縣各缺由吏部已經並補者並請

飭部查明催令迅速前來如逾限一年例應革職者卽
由部查明開缺竊維地方已經克復固需實缺人員以
資治理地方未經克復該員等或由京曹外放或由吏

部銓選分發多係未諳軍務之員正宜隨營差遣以資
學習乃近來軍務省分廣缺人員及分發人員往往因
規避本省干求各省督撫奏留差委或藉稱道梗或藉
稱患病或藉稱措備資斧延不赴任迨地方稍靖則又
紛至沓來似此觀望取巧志趣可知卽當無事之時一
官一邑亦斷難期稱職應請嗣後凡升調選補及分發
浙省各員概不准他省奏留以爲規避取巧者戒是否
有當伏乞

皇上聖鑒訓示施行謹

奉 同治元年七月初九日

議政王軍機大臣奉

旨另有旨欽此

同治元年閏八月初三日內閣奉

上諭左宗棠奏請飭催道府各員迅速赴浙一摺浙江
實缺人員延不到省現值差委需人豈容隨處逗遛藉
資延宕金衢嚴道恒山處州府知府劉熙盛著各省督
撫查明該員等現在何處逗遛卽著飭令迅速赴浙金
華府知府徐寶治前經李鴻章奏留差委浙江現旣需

人仍著該署撫飭赴本任毋任延悞此外浙江州縣各
缺由部選補者著該部查催卽速赴任如逾限不到卽
著照例參辦近來軍務省分實缺分發人員往往規避
本省千求各省督撫帶兵大臣奏留差委延不到省觀
望取巧殊堪痛恨著俟此次奉旨之日起凡升調選補
及分發各省人員均著催令速赴本任不准藉端遲延
各省督撫等亦不得違例奏留致干懲處欽此

馳援遂安擊敗大股逆賊摺

奏爲官軍馳援遂安擊敗大股逆賊現籌進取情形仰
祈

聖鑒事竊臣軍攻剿蓮花峽口裏黃外黃一帶賊壘肅
清三衢本擬進攻龍游壽昌以規金華前經奏明在案
六月十一十二等日先後耀兵龍游對岸兼察地勢城
賊鼠伏不動臣竊料其必有詭謀十五日遂安謀報有
大股賊由嚴州潛安而來前隊至遂安東亭四都地方
沿途賊館亘數十里其來迅速臣以逆首李世賢最稱

總督此次賊數眾多賊蹤飄忽必此逆親來無疑當飛
飭防守遂安之鹽運使銜卽選道王文瑞率所部老湘
營嚴守城壘密飭新授臬司劉典率馬步九營卽夜由
嶺路借道馳援與王文瑞併力截剿一面飛飭由湖南
調來之卽選知府魏喻義率桂勇二千由常山取道華
埠馬金扼賊昏口防其上竄又飛飭江西遣令赴援之
卽選道屈蟠王德榜等由西安常山出華埠截之蓋以
李逆詭計始終以就糧江皖斷吾餉道爲主雖經屢次
痛創其奸謀未嘗息也十八日李逆世賢率悍賊數萬

分兩路攻撲遂安縣城王文瑞飭各營穩守待賊撲近
始令楊海泰康光耀等驟發大砲飽以羣子轟斃騎馬
賊目十餘名賊勢轉而南趨適赴援之左營所部三哨
先由僻道馳至賊見官軍旗幟從嶺巔倏來不測援師
多寡驚駭而奔左營三哨時因晝夜趨行已忍飢日半
矣王文瑞開壁迎之餐畢合隊由西門出擊縱橫掃決
斃賊不計其數賊之列隊對岸者復開礮抗拒我軍亦
用鎗砲排擊其墜貴身中砲傷力戰不退東路之賊見
我軍由西路出擊渡河來撲東門復經康榮詔等擊退

兩戰計斃悍賊一千餘名奪獲旗幟鎗二三百餘件少頃援師大隊畢至始各收隊而還此十八日獲勝之實在情形也二十日劉典督名營山遂安南路進剿行至三多麥田地方李逆出悍賊千餘接戰餘賊盡伏於對岸山內圖俟我軍過河即分路來抄劉光明李世顏黃大玉馬德順等督隊迎戰傷李良平從後接應楊鼎勲楊和貴率所部防東岸之賊鏖戰四時之久斃賊敗十名賊猶拚命抗拒後路之賊復蜂擁而至中營哨長郭文彬力戰死之官軍勢漸不支李良平楊鼎勲楊和貴

率所部橫截而出立斃滿長悍賊數十名賊始收遁官
軍躡蹤緊追沿途約斃悍賊二百餘名日晚乃徐徐收
隊而還李世賢自十八二十日兩次擊敗之後知遂安
城守嚴固援師麇集遂於廿二日鳳竄而去探報大股
由淳昌回金華劉典派馬隊追剿僅斬其拒後悍賊三
十餘名其中鎗砲子傷不能行動者不下數百則悉斬
之解散者從約數千計據生擒賊供稱李逆妄冀官軍
進攻龍游喉各賊持半月糧潛從蘭溪嚴州遁安徑撲
遂安爲乘虛襲取遂安分擾江皖之計不料遂安城守

殿國援師速至復爲所敗搜獲賊中五月廿四日僞文
言金陵急須援救然必先將衢州官軍擊退始可前往
現探該逆回竄金華修濬城河盡調各路悍賊歸併金
華湯溪蘭溪龍游武義等處拚命抗拒臣於拜摺後卽
率各營進攻龍游蘭溪湯溪等處規復金華仍飭王友
瑞嚴守遂安魏喻義仍駐晉口以防旁竄所有是戰及
前此江山縣花園巷諸戰皆以數千之衆擊退僞逆數
萬數十萬之賊力遏兇鋒保全江皖邊圉諸將士奮勉
用命備極勞瘁可否由臣擇其尤爲出力者附入開化

遂安三捷案内保奏之處出自

恩施謹會同協辦大學士兩江總督臣曾國藩恭摺由
驛馳奏伏乞

皇上聖鑒訓示施行謹

奏 同治元年七月十二日

議政王軍機大臣奉

旨另有旨欽此

同治元年七月二十九日內閣奉

上諭左宗棠奏官軍馳援遂安擊退大股逆賊一摺浙

江逆賊由嚴州清安竄至遂安東平四都地方經左宗
棠飭令防守遂安之卽選道王文瑞嚴守城壘並分派
將領倍道馳援六月十八日逆首李世賢率悍賊數萬
分撲遂安縣城王文瑞待賊撲近驟發大砲擊斃賊目
十餘名賊勢欲退適值援軍由僻道馳至匪衆駭奔王
文瑞開門與援軍合隊縱擊斃賊不計其數東路來援
之賊亦經我軍擊退斃悍賊一千餘名奪獲旗幟鎗砲
三百餘件其對岸山內伏賊復經臬司劉典等分飭所
部剿擊各有斬擒斃賊甚多賊竄敗遁官軍跟追沿途

共斃悍賊三百餘名餘賊逃山溝歸竄回金華著左宗
棠督飭各將士乘此聲威分路進攻金華毋令逆匪久
踞所有尤爲出力員弁著准其彙案保奏欽此

總兵請假回籍遊員接署摺

奏爲總兵請假回籍現在遊員咨署恭摺奏祈

聖鑒事竊臣接准署衢州鎮總兵李定太咨呈定太於
道光三十年由行伍奉派出師廣西轉戰數省受傷四
次疊擢今職上年正月間奉檄辦理衢郡防務本年四
月內奉委署理衢州鎮篆涓埃未報悚惕殊深伏念定
太生母於咸豐元年在湖南常德原籍身故因家無次
丁尙浮屠未葬兼之生父年逾七十老病侵尋祇緣軍
務倥傯未敢陳情省視茲幸大軍臨蒞業將衢郡南北

數十里賊壘一律蕩平防務稍鬆用敢瀝情請假六箇月俾得回籍安葬母喪並以省視父病略盡烏烏私情一俟假滿仍否來浙備員報效之處懇聽裁酌等因前來臣維總兵李定太自道光三十年出師從征至今十有三載身經百戰以榮績疊奉

恩命薦擢總兵自上年辦理衢州防務以來守禦嚴密尙無貽悞該員明白幹練與臣共事數月遇事諮商毫無訛謬茲據咨請給假六箇月回籍葬母省視父病並而陳各情至爲懇切現值衢州防務稍鬆所部兵勇又

經資遣回籍歸伍該總兵請假六箇月事尙可行將來
假滿應否咨調募勇赴浙屆時仍由臣奏明請

旨至實任衢州鎮總兵朱品隆現在皖南帶勇防剿暫
難赴任查有奏調來浙之前處州鎮候補總兵劉培元
現在衢州以之接署衢州鎮篆可期無悞理合具奏伏
乞

皇上聖鑒訓示施行謹

奏
同治元年七月十一日

議政王軍機大臣奉

旨李定太著賞假六箇月欽此

查造衛防兵勇片

再署衢州鎮總兵李定太所部兵勇五千餘均由前撫臣王有齡收輯金陵大營及皖南軍營弁勇陸續歸併交其統帶營名既多冗雜太甚又從征日久欠餉過多除由會同藩協撥餉銀二萬兩米三千石勉資日食外積欠餉銀尙有三十七萬餘兩銳氣銷磨士無鬪志李定太亦深以爲慮臣維現在浙省餉源已竭無可虛糜若不急籌遣撤則餉欠愈增軍情愈渙匪特不能得其

力並將受其累臣竭力搜括得銀四萬三千兩交奉定
太按名散遣每員弁酌給四十日薪水每兵勇長夫酌
給四十日口糧臣復傳集各隊目剴切曉諭令其安靜
回籍歸伍該員弁兵勇亦均知臣糧台存項蕩然無可
希冀積欠之餉概不索取據報現已分起行走出境查
衢防尚有衢州鎮標兵丁一千餘名勇丁五百名應由
接署總兵劉培元挑汰募補務期漸次整理克收實效
所有資遣衢防兵勇緣由理合附片陳明伏乞

皇上聖鑒謹

初編卷三

西

奏同治元年七月十二日

議政王軍機大臣奏

旨知道了欽此

查辦失守文武先將情罪較重之員定擬摺

奏爲遵

旨查辦失守文武謹將情罪較重之員先行定擬具奏
請

旨以肅法紀而昭炯戒事竊浙江省城失守列郡淪亡
失事文武各員紛紛逃匿疊次欽奉

諭旨交臣查辦該員等先後赴營投到呈遞親供業經
臣附片奏明在案據已革布政使林福祥親供該革員
自咸豐十一年五月帶勇入浙時金華蘭溪均已失守

該革員剿賊蘭溪獲勝六月廿日會同羅大春克復嚴
州七月初四初八等日擊退桐廬賊匪八月十九日奉
前撫臣檄進省城接藩司印二十七日奉檄赴諸暨九
月十六日擊退諸暨賊匪二十三日賊圍省城二十八
日該革員還救紮營江口次日帶中營親兵入城十月
初二日賊眾大至合圍益密江口營盤均已隔絕城中
乏食十一月二十八日賊眾四面乘城省垣遂陷先十
日前撫臣密札該革員及麟趾以杭城糧盡援絕事無
可爲惟况副將江口水陸各營尙有一萬數千人查該

司所部營盤尙在江口城陷之後應卽設法出城收集潰散會合援師迅圖恢復並會同杭州將軍瑞昌以帛書奏件交該革員與麟趾奏呈

御覽杭城破時該革員及織造恒起已革總兵米興朝同入滿城十二月初一日滿城又陷該革員同米興朝恒起等由錢塘門繞出武林門至海塘五堡地方聞知江口營盤又已潰散初九日由五堡小路繞道而行十六日至餘杭德清交界之處二十六日抵桐鄉二十八日至屠田鎮同治元年正月十六日由屠田奔至江南

提督曾秉忠五索營盤二十五日到上海三月二十八日由上海起程五月二十七日抵衢州赴行營籲懇奏請從重治罪據已革總兵米興朝呈遞親供該革員於道光三十年出師粵西濬升福建汀州鎮總兵加提督銜十年二月因浙江省城失守救援不力奏參革職留營効力四月因克復臨安孝豐廣德建平四城奉

旨暫署浙江提督旋因廣德復失奉

旨撤任十一年三月因在浦被陷奉

旨發往軍臺暫留軍營効力贖罪七月內准前撫臣咨

調防守義烏八月浦江失守義烏亦失前撫臣咨調回
省養傷十月初二日杭城望江候潮鳳山各門外營盤
均被逆賊踏毀內外隔絕革員裹傷登陴二十八日賊
由鳳山候潮等門上城饑軍不能抵禦杭城遂陷革員
與林福祥同入滿營十二月初一日滿城又陷革員由
錢塘門繞至武林門展轉至桐鄉縣屬之屠田鎮由周
莊繞至毛灘洛港適遇江蘇副將李恒松游擊李思彪
礮船革員即在水營調治同治元年正月二十八日行
抵上海三月初八日由上海起程五月二十六日到浙

顧懇奏請從重治罪臣查林福祥以本任藩司募勇赴浙賊未圍杭之前未能扼賊奔衝賊既圍杭之後未能背城一戰徒藉前撫臣十一月十八日設法出城收輯潰卒一札預爲避免之計後十日杭城陷巡撫主有齡死之林福祥不死復入滿營十二月初一日滿城陷將軍瑞昌副都統榮純死之林福祥不死江口營盤潰卒不可得而收矣海甯湖州不可得而至矣出浙一步便非死所矣猶復展轉逃匿始奔江南提督曾秉忠營繼奔江南上海時逾四月而後行抵衢州幾忘其身爲浙

江方面大員幾忘當官有死事之義主兵有失律之誅
竟忍死偷生希求苟免至此咸豐四年武昌失守巡撫
青麐率潰軍至湖南繞道荊州府奉

旨正法

文宗顯皇帝非不知鄂省援盡食絕青麐之情亦有可
原祇以名義攸關紀綱所繫未可屈法宥之

聖懷惻然千載如見至已革總兵米興朝由千總出師
擢至總兵記名

簡放提督十年二月救援省城不力被參革職後復奉

旨暫署浙江提督

天恩高厚何以復加乃旋以廣德失守撤任復以乍浦
被陷發往軍台留營効力旋守義烏以勦金華而義烏
復又失守追前撫臣咨調回省省城陷後逃入滿營滿
城陷後復又逃至上海該革員身獲重咎不思奮勉圖
功屢次失利杭城滿城陷後尙復忍恥偷生屢轉逃匿
且咸豐十年二月浙江省城之失米興朝擁兵不前至
今浙人談之猶有餘恨此次省城之失該革員復希圖
苟免核其情罪實無可原相應請

旨將已革浙江布政使林福祥已革總兵米興朝立正
典刑以肅法紀至前織造恒起本非守土之官亦無領
兵之責罪宜末減應請

旨發任單台効力贖罪以昭平允此外失事各員容俟
另案擬結是否如斯伏乞

皇上聖鑒訓示施行謹

奏

同治元年七月十二日

議政王罕澂大臣奉

旨另有旨欽此

同治元年七月二十九日內閣奉

上諭左宗棠奏遵查失守文武情罪較重之大員先行
定擬請旨遵行一摺據稱已革浙江布政使林福祥於
到任後紮營江口迨檄調入城省垣被陷林福祥避入
滿洲營嗣滿洲營又陷該藩司展轉逃至江南提督曾
秉忠營盤旋即逃赴上海已革提督米興朝於杭城失
陷後亦復繞由桐鄉等處逃至副將李恒松等營內本
年正月間逃至上海所供逃避之情形歷歷如繪請旨
辦理等語林福祥米興朝以文武大員疊受

文宗顯皇帝厚恩不數年間擢任提督布政使該革員等苟天良未泯自應於杭城失陷時卽行奮烈捐軀乃巡撫王有齡將軍瑞昌皆先後殉節而該革員等自觀情形恬不知恥仍復展轉逃匿忍辱偷生希求苟免若不從嚴懲辦何以肅軍律而正人心林福祥米興朝卽著在溫州軍營正法免致久稽顯戮已革杭州織造恒起雖非守土之員而隨同避匿罪實難辭左宗棠所奏發往軍台効力尙覺寬縱恒起著改爲發往新疆充當苦差用示衡情執法辟以止辟之意欽此